

# Aalisarnermi pisarineqartut isumalluutini atuinermut akitsuutaat pillugit Inatsisartut inatsisaat pillugu Namminersorlutik Oqartussat nalunaarutaat

Maanna Kalaallit Nunaanni aalisarnermi pisarineqartut isumalluutini atuinermut akitsuutaat pillugit Inatsisartut inatsisaat nr. 46, 23. november 2017-imeersoq, Inatsisartut inatsisaatigut nr. 13, 27. november 2018-imeersukkut, Inatsisartut inatsisaatigut nr. 8, 19. november 2021-meersukkut, Inatsisartut inatsisaatigut nr. 24, 1. december 2021-meersukkut aamma Inatsisartut inatsisaatigut nr. 27, 25. november 2022-meersukkut allannguutitalik, nalunaarutigineqarpoq.

## *Akitsuummik akiliisussaatitaaneq*

**§ 1.** Suliffeqarfiit aamma inuit Kalaallit Nunaata aalisarnikkut oqartussaaffigisaani, nunat allat aalisarnikkut oqartussaaffigisaanni imaluunniit nunat tamat imartaanni avataasiorluni aamma sinerissap qanittuani aalisarnissamut pisassinneqarsimasut akuersissummilluunniit peqartut pisamik landskarsimut akitsuutaannik, Inatsisartut inatsisaanni matumani aalajangersakkat naapertorlugit akiliissapput.

*Imm. 2.* Akitsuummik akiliisussaatitaaneq piffissami pisarineqarfianni atuutilissaaq.

*Imm. 3.* Imm. 1-imi aalajangersagaq apeqqutaatinnagu, Naalakkersuisut aamma nunani allani nunamiluunniit maani oqartussaasut aalisarnek pillugu isumaqatigiissutaat naapertorlugit Kalaallit Nunaata aalisarnikkut oqartussaaffigisaani aalisarnek inatsimmi matumani pineqatunut ilaanngilaq.

**§ 2.** Akitsuut akilerneqartussanngussaaq:

- 1) pisat Kalaallit Nunaannit anninneqarfianni,
- 2) tunitsivimmut tunisassiorfimmulluunniit, matumani aamma umiarsuarmut tunitsivimmut tulaassinermi,
- 3) inummut pingajuusumut tunniussinermi.

**§ 3.** Avataasiorluni raajarniarnermi, qaleralinniarnermi, saarullinniarnermi, kullererniarnermi, saarulliusaarniarnermi aammalu suluppaagarniarnermi akitsuutit §§-ini 4-mit 7-imut maleruagassat naapertorlugit akilerneqassapput.

*Imm. 2.* Sinerissamut qanittumi raajarniarnek qaleralinniarnerlu §§ 4-7-mi malittarisassat naapertorlugit akitsuuteqartinneqassapput.

*Imm. 3.* Avaleraasartoorarniarnermi, ammassassuarniarnermi, ammassanniarnermi, saarullernarniarnermi guldlakserniarnermiluunniit akitsuutit § 8-mi maleruagassat naapertorlugit akilerneqassapput.

*Imm. 4.* Aalisakkat allat imm. 1-imiit 3-mut taaneqanngitsut kiilumut akitsuutaat 0 kr.-iuvoq.

#### *Akitsuusigassat*

§ 4. Akitsuut tunisinermi, tassa pisat kiilumut ataatsimut tunineranni tulaanneranniluunniit akiusup procentinngorlugu ilaanit akilerneqassaaq. Pisisaq suliareqqitaappat aalisakkatut ilivitsutut naatsorsorneqartassaaq. Aalisagaq ilivitsaq ima paasineqassaaq pisat ilaasa nalunaarutigineqarnerini naatsorsueriaatsit pillugit Namminersorlutik Oqartussat nalunaarutaat naapertorlugu aalisakkap uumanermini oqimaassusiatut naatsorsorneqartoq. Tunisinermi aki tassaavoq aki pisisumit tunisisumillu isumaqatigiissutaasoq, tassunga ilanngullugit bonusini tapiissutaasinnaasut, assartorneqarnerannut tapit assigisaalluunniit aningaasaqarnikkut nalillit aammalu tuniniaanerimi aningaasartuutit, assartuineq il.il. ilanngaatinagit.

*Imm. 2.* Nunanut allanut nioqquteqartup Kalaallit Nunaanniit Kalaallit Nunaata avataani apuuffissaannut assartuinerimi aningaasartuutit ilanngutinngippagit, tunisinermi aki pisanut akitsuusigassanut kiilumut 1 kr.-imik qaffanneqassaaq.

*Imm. 3.* Pisineqartut suliareqqinneqarnissat siunertaralugu Kalaallit Nunaanni tunitsivimmut tunisassiorfimmulluunniit tulaassinerimi tunisinermi akigititat pillugit Naatsorsueqqissaartarfimmit paasissutissat atorineqassapput.

*Imm. 4.* Tunisinermi akigititaq imminnut attuumassuteqanngitsumik niuertut akornanni niuernermit allaanerumik aalajangersarneqarsimappat akileraaruseriffup tunisinermi akigititaq aalajangersarsinnaavaa, niuertut imminnut attuumassuteqanngitsut niueqatigiinnerminni angusarisinnaasaannut naapertuuttumut.

*Imm. 5.* Sillimmasiissutit taarsiivigineqarnerillu tunisinermi akisulli isigineqarput.

#### *Tungaviusumik akitsuut*

§ 5. Pisanik inummut pingajuusumut tunniussinerimi imaluunniit Kalaallit Nunaannit annissinerimi akitsuut kiilumut 0 kr. 20 øre-ussaaq, aalisagaqatigiit kvartali annissiffusoq tunniussiviusorluunniit kvartalinik marlunnik sioqqullugu tunineqarneranni agguaqatigiissillugu akiat kiilumut 12 kr.-init minneruppat.

*Imm. 2.* Kalaallit Nunaanni tunitsivimmut tunisassiorfimmulluunniit suliareqqitassanik tulaassinerimi akitsuut kiilumut 0 kr. 5 øre-ussaaq, aalisagaqatigiit kvartali tulaassiffusoq kvartalinik marlunnik sioqqullugu tunineqarneranni agguaqatigiissillugu akiat kiilumut 8 kr.-iuppat.

*Imm. 3.* Sinerissap qanittuani qaleralittanik Kalaallit Nunaanni tunitsivinnut tunisassiorfinnulluunniit pisanik suliarineqartussanik tunisinermi, akitsuut kiilumut 0 kr.-uvoq.

#### *Isumalluutininik atuinermi iluanaarutinit akitsuut*

§ 6. Pisanik inummut pingajuusumut tunniussinerimi imaluunniit Kalaallit Nunaannit annissinerimi akitsuut tunisinermi akiusup 5,5 procenterissavaa, aalisagaqatigiit kvartali annissiffusoq tunniussiviusorluunniit kvartalinik marlunnik sioqqullugu tunineqarneranni agguaqatigiissillugu akiat kiilumut 12 kr.-iuppat angineruppalluunniit, taamaattorli tak. imm. 3.

*Imm. 2.* Aalisagaqatigiit kvartali annissiffusoq tunniussiviusorluunniit kvartalinik marlunnik sioqqullugu tunineqarneranni agguaqatigiissillugu akiat kiilumut 17 kr.-init angineruppat, akitsuutip procentia

aalisagaqatigiit tunineqarneranni agguaqatigiissillugu akiat kiilumut 17,00 kr.-i qaangerlugu koruunit aallartinneri tamaasa 1 procentpointimik qaffattassaaq, tak. imm. 4.

*Imm. 3.* Akitsuutip procentiata 18,4 procent qaangissanngilaa.

*Imm. 4.* Akitsuutit procentii kvartalit akitsuutit atuuffissaat kingusinnerpaamik sapaatip akunneranik ataatsimik sioqqullugit akileraaruseriffiup nittartagaatigut tamanut saqqummiunneqassapput.

*Imm. 5.* Qaammatit pingasukkaat ingerlaneranni ukiup siuliani aalisakkamut akitsuuserneqartussaataasumut pisassanit tulaanneqartussaataaangitsunit 10 procentinik ikinnerusut avammut anninneqarnerani, aalisakkap akitsuuserneqartussaataasup akitsuuserneqarnerani toqqammavissatut ukiup siuliani qaammatit pingasukkaat pisassat tulaanneqartussaataaangitsut kingullermik 10 procentinik amerlanerusunik avammut anninneqarnerani agguaqatigiissillugu tunisinermi aki atorineqassaaq, takuuk imm. 1 aamma 2.

**§ 6 a.** Saarullinnut, kulleranut, saarulliusaanut suluppaakkanullu § 6, imm. 1 malillugu akitsuut 5 procentiuvoq.

*Imm. 2.* Saarullinnut, kulleranut, saarulliusaanut suluppaakkanullu § 6, imm. 3 malillugu akitsuut 17,9 procentiuvoq.

**§ 7.** Pisarineqartut suliareqqinneqarnissat siunertaralugu Kalaallit Nunaanni tunitsivimmut tunisassiorfimmulluunniit tulaassinermi akitsuut akisup 5 procenterissavaa, aalisagaqatigiit kvartali tulaassiffusoq kvartalinik marlunnik sioqqullugu tunineqarneranni agguaqatigiissillugu akiat kiilumut 8 kr.-iuppat angineruppalluunniit.

*Imm. 2.* Akitsuummik akiliisoqassanersoq akileraaruseriffiup internetikkut nittartakkamigut, kvartalit akitsuutit atuuffissaat kingusinnerpaamik sapaatip akunneranik ataatsimik sioqqullugit tamanut saqqummiuttassavaa.

*Imm. 3.* Qaammatit pingasukkaat ingerlaneranni ukiup siuliani aalisakkamut akitsuuserneqartussaataasumut pisassanit tulaanneqartussaataasunit 10 procentinik ikinnerusut pisarineqarpat, aalisakkap akitsuuserneqartussaataasup akitsuuserneqarnerani toqqammavissatut ukiup siuliani qaammatit pingasukkaat pisassat tulaanneqartussaataasut kingullermik 10 procentinik amerlanerusunik pisaqarfusumi agguaqatigiissillugu tunisinermi aki atorineqassaaq, takuuk imm. 1.

*Imm. 4.* Sinerissap qanittuani qalerallitanik tunisinermi akitsuut akip 0 procenteraa.

#### *Aalisakkanik ikerinnarsiortunik aalisarnermi akitsuutit*

**§ 8.** Angallatinut Kalaallit Nunaanni angerlarsimaffeqartutut aamma Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasunut tunngatillugu akitsuutit ima angissusilerneqarput:

1) Ammassassuaq,

a) angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarineqartoq..... kiilumut 0 kr. 25 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarineqartoq ..... kiilumut 0 kr. 80 øre.

2) Ammassak,

a) angallat Kalaallit Nunaanni angerlarsimaffeqartutut nalunaarsorneqarsimasoq atorlugu pisarineqartoq .....kiilumut 0 kr. 15 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasoq atorlugu pisarineqartoq ..... kiilumut 0 kr. 70 øre.

3) Avaleraasartooq,

a) angallat Kalaallit Nunaanni angerlarsimaffeqartutut nalunaarsorneqarsimasoq atorlugu pisarineqartoq ..... kiilumut 0 kr. 40 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasoq atorlugu pisarineqartoq ..... kiilumut 1 kr. 00 øre.

4) Saarullernaq,

a) angallat Kalaallit Nunaanni angerlarsimaffeqartutut nalunaarsorneqarsimasoq atorlugu pisarineqartoq ..... kiilumut 0 kr. 15 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasoq atorlugu pisarineqartoq ..... kiilumut 0 kr. 70 øre.

5) Guldlaks,

a) angallat Kalaallit Nunaanni angerlarsimaffeqartutut nalunaarsorneqarsimasoq atorlugu pisarineqartoq ..... kiilumut 0 kr. 15 øre.

b) angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasoq atorlugu pisarineqartoq ..... kiilumut 0 kr. 70 øre.

*Imm. 2.* Akitsuut pisat uumatillugit oqimaassusiat naapertorlugu naatsorsorneqassaaq.

*Imm. 3* Aktie- imaluunniit anpartsselskabip Kalaallit Nunaanni angerlarsimaffeqartup angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasoq inuttaqartinnagu, kisiannili angallatip naalagaa, maskinmesteria taakkuluunniit marluk kisiisa ilanngullugit attartorpagu, akitsuutit angallatinut Kalaallit Nunaanni angerlarsimaffeqartutut nalunaarsorneqarsimasunut atuuttut akilerneqassapput.

#### *Piffissaq akitsuusiiffissaq aamma akisussaaneq*

**§ 9.** Piffissaq akitsuusiiffissaq tassaavoq kvartali.

**§ 10.** Inatsimmi matumani aalajangersakkat naapertorlugit akitsuutit akilerneqarnissaannut akisussaasuvoq pisassinneqarsimasoq akuersissumilluunniit peqartoq.

*Imm. 2.* Aalisarneq pisassiisutit akuersissutilluunniit aalajangersimasut naapertorlugit ingerlanneqanngippat aalisarnermik ingerlataqartoq akitsuutit akilerneqarnissaannut akisussaassaaq.

#### *Akitsuutinik unerartitsineq*

**§ 11.** Kalaallit Nunaanni tunitsivimmut tunisassiorfimmulluunniit suliareqqitassanik tulaassisoqartillugu tulaassinermut atatillugu akiliutissanik tunniussisussap akitsuut akiliutissanit unerartissavaa.

Unerartitsineq pissaaq unerartitsisussaasup aningaasanik unerartinneqartussanik naatsorsuineratigut, aningaasanillu taakkuninnga akiliutissanit ilanngaatiginninneratigut.

*Imm. 2.* Unerartitsisussaasoq naatsorsuusiussaaq, akitsuutip naatsorsorneqarnissaanut akitsuutillu eqqortumik akilerneqarnissaata nakkutigineqarnissaanut tunngaviusussanik.

*Imm. 3.* Kinaluunniit akitsuutininik ilanngaassisussaannerminik naammassinninngitsoq taakkuluunniit minnaarlugit ilanngaassisoq, tak. § 11, imm. 1, aningaasat amigaataasut akilernissaannut akisussaavoq, pineqartup Inatsisartut inatsisaanni matumani aalajangersakkanik maleruaaniarnermini sumiginnaasimannginnera uppersarsarneqanngippat.

*Imm. 4.* Akitsuummik Inatsisartut inatsisaat manna naapertorlugu unerartitsisoq, aningaasat unerartinneqartut akilerneqarnissaannut akisussaasuvoq.

**§ 12.** § 11 naapertorlugu unerartitsisuussaasup, piffissap akitsuusiiffusup qaangiunnerani, kingusinnerpaamillu piffissap akitsuusiiffusup qaangiunnerata kingorna qaammammi ulluinnarmi kingullermi:

- 1) akitsuusigassat nalunaarutigissavai,
- 2) taakku akitsuutitaat unerartinneqartoq nalunaarutigissavaa, kiisalu
- 3) akitsuut akileraaruseriffimmut akilissallugu.

*Imm. 2.* Piffissami akitsuuteqarfusumi akitsuutit akilerneqartut aalisagaqatigiinnut ataatsinut nalunaarsorneqartut 100 kr.-init ikinneruppata akitsuutininik taakkuninngalu akilikkanut nalunaarsuutit piomasagaatigineqassanngillat.

*Imm. 3.* Nalunaarut imm. 1-imi pineqartoq piffissaagallartillugu nassiunneqanngippat akiliisitsissut piffissami akitsuutip akilerneqartussap 2 procentianik angissusilik, taamaattorli minnerpaamik 500 kr.-iusoq akilerneqassaaq.

*Imm. 4.* Unerartitsisuussaasup naatsorsuusiornissaa, allaffissornissaa il.il. pillugit maleruagassat sukumiinerusut Naalakkersuisut aalajangersarsinnaavaat.

*Tunngaviusumik akitsuutip, isumalluutininik atuinermi iluanaarutinit akitsuutip kiisalu aalisakkanik  
ikerinnarsiortunik aalisarnermi akitsuutit akilerneqarnissaat*

**§ 13.** Suliffeqarfiit inuillu akitsuutininik akiliisussaasut § 1, imm. 1-imi taaneqartut tunisat, annissuinerit il.il. pillugit naatsorsuusiussapput, akitsuutip naatsorsorneqarnissaanut akitsuutillu eqqortumik akilerneqarnissaata nakkutigineqarnissaanut tunngaviusussanik.

*Imm. 2.* Suliffeqarfiit inuillu akitsuutininik akiliisussaasut § 1, imm. 1-imi taaneqartut, piffissap akitsuusiiffusup qaangiunnerani, kingusinnerpaamillu piffissap akitsuusiiffusup qaangiunnerata kingorna qaammammi ulluinnarmi kingullermi:

- 1) akitsuusigassat nalunaarutigissavaat,
- 2) taakku akitsuutitaat nalunaarutigissavaat, kiisalu
- 3) akitsuut akileraaruseriffimmut akilissallugu.

*Imm. 3.* Akiligassiissutit il.il. nalunaarummut tunngaviusut assilineri, Kalaallillu Nunaannit annissinermut atatillugu suliarineqartut, nalunaarummut ilanngunneqassapput.

*Imm. 4.* Piffissami akitsuuteqarfusumi akitsuutit akilerneqartut aalisagaqatigiinnut ataatsinut nalunaarsorneqartut 100 kr.-init ikinneruppata akitsuutininik taakkuninngalu akilikkanut nalunaarsuutit piomasagaatigineqassanngillat.

*Imm. 5.* Nalunaarut imm. 1-imi pineqartoq piffissaagallartillugu nassiunneqanngippat akiliisitsissut piffissami akitsuutip akilerneqartussap 2 procentianik angissusilik, taamaattorli minnerpaamik 500 kr-iusoq akilerneqassaaq.

**§ 14.** Naalackersuisut inuit selskabillu il.il. akitsuutinik piffissaagallartillugu akiliisimangitsut, § 12, imm. 1-imi, imaluunniit § 13, imm. 2-mi taaneqartumit sivikinnerusumik akiliinissamut piffissalersinnaavaat, akitsuutillu akilerneqarnissaannut qularnaveeqqusiisoqarnissaa piumasarisinnaallugu.

#### *Piginnaatitsineq*

**§ 15.** Inatsisartut inatsisaata atuutsinneqarnissaa aammalu tulaassinerup qaqugukkut pisarnera pillugu maleruagassat erseqqinnerusut Naalackersuisunit aalajangersarneqarsinnaapput.

#### *Paasissutissanik ingerlatitseqqinneq*

**§ 15 a.** Paasissutissat suliffeqarfiit akitsuutinik akiliisussaataasut tunniussaata aqutsinermi oqartussanut allanut naatsorsueqqissaarnermi misissueqqissaarnermilu siunertanut atugassatut tunniunneqarsinnaapput.

*Imm. 2.* Naalackersuisut akileraarutinik aqutsisoqarfiup paasissutissanik tigusaminik suliarinnittarneranut, tassunga ilanngullugit paasissutissat suut, siunertanut sunut qanorlu iliorluni tunniunneqarsinnaasut pillugit malittarisassiorsinnaapput.

#### *Misileraalluni aalisarneq*

**§ 16.** Naalackersuisut akitsuummik akiliinnginnissamik qinnuteqaat akuerisinnaavaat misileraalluni aalisarnissaq peqassutsimut imaluunniit inuussutissarsiornermut pingaaruteqartoq akuersissutigineqarsimappat, aammalu akiliinnginnissamik akuersinerup aningaasatigut sunniutissai annertunngippata.

#### *Pineqaatissiinerit*

**§ 17.** § 1, imm. 1, § 11, imm. 2, § 12, imm. 1, § 13, imm. 1-3-mik imaluunniit § 14 naapertorlugu akiliinissamut piffissarititap sivikinnerusup atorneqarnissaaq imaluunniit qularnaveeqqusiinissamik peqqussuteqarnermik piaaraluni mianersuaalliorujussuarluniluunniit unioqqutitsineq Kalaallit Nunaanni pinerluttulerinermut inatsit malillugu pineqaatissiinerimik kinguneqarsinnaapput.

*Imm. 2.* Kalaallit Nunaanni Pinerluttulerinermik inatsimmi maleruagassat naapertorlugit akiliisitsinissaq, maleruagassani inatsisartut inatsisaat manna naapertorlugu atuutilersinneqartuni maleruagassiuunneqarsinnaavoq.

*Imm. 3.* Inatsisartut inatsisaat imaluunniit maleruagassat taanna naapertorlugu atuutilersinneqartut akiliisitsissummik aalajangersaasinnaanermik periarfissiippata, inatsisit malillugit inuttut isigineqarsinnaasooq Kalaallit Nunaanni Pinerluttulerinermik inatsimmi maleruagassat naapertorlugit akiliisinneqarsinnaavoq.

*Imm. 4.* Imm. 1-imiit 3-mut naapertorlugit akiliisitsissutit landskarsip pisassarai.

**§ 18.** Unioqqutitsineq akiliisitsissutip saniatigut annertunerusumik malersorneqartariaqanngitsutut akileraaruseriffimmit nalilerneqarpat Naalakkersuisut, Naalakkersuisulluunniit tamatumunga piginnaatitaata pineqartumut nalunaarutigisinnaavaat suliassaq eqqartuussinertaqanngitsumik naammassineqarsinnaasoq, pineqartup unioqqutitsinini nassuerutigippagu akiliisitsissullu nalunaarummi taaneqartoq piffissap erseqqinnerusup, qinnuteqarnikkut sivitsorneqarsinnaasup ingerlanerani akilerumappagu.

*Imm. 2.* Nalunaarutiginninnermut imm. 1-imi taaneqartumut atatillugu Kalaallit Nunaannut eqqartuussisarnermik inatsimmi maleruagassani unnerluutiginninnermut allassimasut atuutissapputtaaq.

#### *Atortuulerfia*

**§ 19.** Inatsisartut inatsisaat 1. januar 2018-imi atortuulissaaq, atuutissallunilu aalisakkanut 1. januar 2018-imi kingusinnerusumiluunniit aalisarneqartunut tunniunneqartunulluunniit.

*Imm. 2.* Ilutigitillugu atorunnaarsinneqassapput:

- 1) Qalerallit aamma aalisakkat allat ilaasa akitsuutaat pillugit Inatsisartut inatsisaat nr. 11, 3. december 2012-imeersoq,
- 2) Raajanut akitsuutit pillugit Inatsisartut inatsisaat nr. 20, 25. oktober 1990-imeersoq aammalu
- 3) Aalisarnermut atatillugu atuisunut akiliteqartitsineq pillugu Namminersorlutik Oqartussat nalunaarutaat nr. 9, 27. juni 2013-imeersoq, taamaattorli tak. imm. 3.

*Imm 3.* 2018-imi kvartalimut siullermut aappaannullu akitsuutit procentii angissusilerneqassapput qalerallit, saarullit, suluppaakkat, kullerit, saarulliusaat, uiluiit saattussallu nunanut allanut tunineqarneranni kvartalimut agguaqatigiisillugu akit pillugit paasissutissat, Danmarks Statistikip nunanik allanik niueqateqarneq pillugu kisitsisaataaneersut tunngavigalugit. Raajanulli tunngatillugu tunngavineqassapput akit pillugit paasissutissat inuussutissarsiummik ingerlatallit, Raajanut akitsuutit pillugit Inatsisartut inatsisaat nr. 20, 25. oktober 1990-imeersoq naapertorlugu Akileraartarnermut Aqutsisoqarfimmut nalunaarutigisimasaat.

*Imm. 4.* Raajanut 2018-imi tuniniagassatut nunanullu allanut nioqqutissatut kilisaatinit tuni-sassiorfutigisunit 2017-imi aalisarneqartunut tunngatillugu akitsuut, Raajanut akitsuutit pillugit Inatsisartut inatsisaat nr. 20, 25. oktober 1990-imeersoq naapertorlugu akilerneqassaaq.

Inatsisartut inatsisaat nr. 13, 27. november 2018-imeersoq (Akitsuutitigut tunngavigisat allangortinneqarnerat, saattuat uiluiillu akitsuuteqartinninnissaat, sinerissamut qanittumi qalerallitanut akitsuutit appartinneqarnerat, pisanik inummut pingajuusumut tunniussinermi imaluunniit Kalaallit Nunaannit annissinermi akitsuutip annertunerpaaffissaata qaffanneqarnera)<sup>[1]</sup> ima atulernissamut aalajangersagaqarpoq:

Inatsisartut inatsisaat manna 1. januar 2019-imi atuutilerpoq aammalu aalisakkanut 1. januar 2019-imi kingusinnerusukkulluunniit aalisarneqartunut atuutissalluni.

*Imm. 2.* 2019-imi kvartalimut siullermut aappaannullu akitsuutit procentii 2018-imi kvartalit pingajuanni sisamaannilu agguaqatigiissillugu akiusut pillugit paasissutissat tunngavigalugit aalajangersarneqassapput.

Inatsisartut inatsisaat nr. 8, 19. november 2021-meersoq (Inatsisip taaguutaanik, akitsuutit tunngaviinik uppernarsaasionermik aamma uppernarsaatit naatsorsueqqissaarnermi misissueqqissaarnermilu siunertanut atorneqarnissaannut periarfissanik allannguineq)<sup>[2]</sup> ima atulernissamut aalajangersagaqarpoq:

## § 2

Inatsisartut inatsisaat ulloq 1. januar 2022 atuutilersinneqarpoq aamma aalisakkat pisarineqartunut imaluunniit ulloq 1. januar 2022 kingusinnerusukkulluunniit tunniunneqartunut atuulluni.

Inatsisartut inatsisaat nr. 24, 1. december 2021 (Aalisakkat avammut nioqqutigineqartut akiitsuuserneqartartut akitsuutaasa ilaasa qaffanneqarnerat)<sup>[3]</sup> ima atulernissamut aalajangersagaqarpoq:

## § 2

Inatsisartut inatsisaat ulloq 1. januar 2022-mi atuutilissaaq, takuuk taamaattoq imm. 2 aamma 3.  
*Imm. 2.* Saarullit kullerit, saarulliusaat suluppaakkat kiisalu sinerissap qanittuani raajarniarneq § 6, imm. 1-imi akitsuutaat 5 procentiuvoq ulloq 31. december 2022-p tungaanut.  
*Imm. 3.* Saarullit kullerit, saarulliusaat suluppaakkat kiisalu sinerissap qanittuani raajarniarneq § 6, imm. 3-mi akitsuutaasa qummut killingat taamaat-toq 17,9 procentiuvoq ulloq 31. december 2022-p tungaanut.

Inatsisartut inatsisaat nr. 27, 25. november 2022-meersoq (Akitsuutit annertussusaannik naleqqussaaneq)<sup>[4]</sup> ima atulernissamut aalajangersagaqarpoq:

## § 2

Inatsisartut inatsisaat ulloq 1. januar 2023 atuutilerpoq.

*Aningaasaqarnermut Akileraartarnermullu Naalackersuisoqarfik , ulloq 24. november 2025*

**Nikolai Sten Christensen (atsior.)**

Pisortaq

/Morten W. Selvejer (atsior.)

- [1] Inatsimmut allannguut §§ 3-7, 11-13 aamma 17-imut tunngavoq
- [2] Inatsimmut allannguut qulequttamut, §§ 13, 15 a aamma 17-imut tunngavoq
- [3] Inatsimmut allannguut §§ 6-imut tunngavoq
- [4] Inatsimmut allannguut §§ 5, 6 a aamma 7-imut tunngavow

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalackersuisut

